

# Samþykkt um götu og torgsölu

## 1. gr. Almennt

Söluskálar og söluvagnar glæða sveitarfélagið lífi þar sem þeir standa og auka fjölbreytni í starfsemi og þjónustu í sveitarfélaginu. Þessari samþykkt er ætlað að tryggja að vel sé staðið að þessum málaflokki og að upplýsingar séu aðgengilegar og gegnsæjar fyrir áhugasama söluaðila.

Hér er um að ræða reglur vegna útgáfu leyfa fyrir götu- og torgsölu í Eyja- og Miklaholtshrepp, sem getur verið:

- **Stöðuleyfi** sem getur gilt í allt að 7 mánuði á ári, frá 1. apríl – 1. október.

Fyrir alla sölustarfsemi sem fær úthlutað stöðuleyfi í Eyja og Miklaholtshrepp gilda þessar reglur:

- Sölustarfsemin má ekki hamla eða trufla umferð um svæðið
- Tryggja þarf aðgengi viðbragðsaðila, s.s. lögreglu og slökkviliðs að staðnum
- Leyfishafar verða ávalt að gæta hreinlætis og sjá til þess að umhverfi sölusvæðis sé snyrtilegt og úrgangur sé flokkaður og honum fargað eins og reglur kveða á um í sveitarfélaginu
- Afla skal allra tilskilinna leyfa vegna þeirrar sölustarfsemi sem á að fara fram á staðnum og framvísa þeim með umsókn

Sölustarfsemi getur m.a. farið fram í:

- Sölubifreið þar sem afgreitt er út um söluop
- Söluvagni sem dreginn er af bifreið eða á annan hátt
- Söluskála, tjaldi eða sölubás.
- Opnu rými undir berum himni t.d. á borði undir sólhlíf, á teppi eða sambærilegu.

Sérstakt ákvæði um útisvæðið við Breiðablik.

- Eingöngu verða gefin leyfi fyrir allt að 3 söluvögnum á afmörkuðu svæði þar.
- Lögð verði áhersla á aðföng úr héraði.
- Heimamenn hafa forgang.
- Áherslur Snæfellsness í umhverfismálum skulu hafðar að leiðarljósi m.a. með því að forðast að nota einota plast ílát eða áhöld.

## 2. gr. Umsóknarferli og úthlutun

Sækja skal um stöðuleyfi vegna götu- og torgsölu í Eyja og Miklaholtshrepp fyrir hvert ár.

Skipulags og byggingarfulltrúi er umsjónaraðili götusölu, sölubása, söluvagna og útmarkaða og sér um framkvæmd leyfisveitinga, eftirlit og upplýsingagjöf. Umsækjandi um stöðuleyfi söluvagna getur nálgast eyðublað á vefslóðinni: <http://eyjaogmikla.is>

Leyfisveitandi auglýsir, eigi síðar en **1. febrúar** ár hvert á heimasíðu Eyja og Miklaholtshrepps hvenær opnað verður fyrir umsóknir um götu- og torgsöluleyfi. Fyrsta árið eftir gildistöku þessara reglna eigi síðar en 12. mars.

Umsóknum skal skilað inn til sveitarfélagsins.

Eftir því sem að umsóknir berast, frá og með tilteknum fyrirfram auglýstum degi, eru þær auðkenndar með dagsetningu og tíma og móttaka staðfest.

Leyfisveiting byggir á mati á þeirri umsókn sem berst, þar sem gera á ítarlega grein fyrir fyrirhugaðri sölustarfsemi og allri umgjörð hennar; vöruframboði, þjónustu, sölutíma, staðsetningu, útliti og öllum aðbúnaði sem starfseminni fylgir. Leitast verður við að hafa fjölbreytta starfsemi á hverjum stað. Leyfi er ekki hægt að framselja.

Með umsókn um skulu fylgja upplýsingar um hvernig staðið verður að sorphirðu, samningur við sorphirðuaðila. Ef um veitingastarfsemi er að ræða skal einnig fylgja formlegur samningur um aðgengi viðskiptavina að salerni í innan við 500 m. fjarlægð frá sölustaðnum. Umrætt salerni skal vera viðurkennt almenningssalerni eða hjá viðurkenndum þjónustuaðila og þarf að vera opið á sama tíma og umrædd sölustarfsemin á að fara fram, þannig að umsóknaraðili geti vísað sínum gestum á aðgengilega salernisaðstöðu.

Á sölusvæði er ekki gert ráð fyrir að leyfisveitandi útvegi tengingar við fráveitu, vatnsveitu, rafmagn, fjarskiptanet eða aðra innviði. Ef umsóknaraðili hyggur á að verða sér út um einhverjar slíkar tengingar skal það koma fram í umsókn með útskýringum um hvernig því verður háttað.

#### **Úthlutun byggir á þremur meginþáttum:**

1. Gæðum umsóknar og þeim upplýsingum sem þar koma fram
2. Kröfu um fjölbreytileika og mismunandi framboð á þjónustu
3. Reynslu af sambærilegum rekstri umsækjenda.

Leyfisveitanda er heimilt að hafna umsóknum ef hann telur að sú starfsemi sem í umsókninni felst uppfylli ekki kröfur til sölustarfsemi og/eða að starfsemin uppfylli ekki kröfur um fjölbreytileika og mismunandi framboð á þjónustu. Umsóknum án tilskilinna gagna og leyfa er hafnað.

#### **3. gr.**

##### **Umgengni**

#### **Eftirfarandi kröfur eru gerðar til leyfishafa:**

- Ávallt ber að gæta hreinlætis og er söluaðila skylt að sjá til þess að umhverfi sölusvæðis sé haldið hreinu. Leyfishafi skal ávallt skila sölusvæði sínu hreinu og í sama ástandi og hann tók við því.
- Mögulegar skemmdir á svæðinu verða lagfærðar af Eyja og Miklaholtshrepp á kostnað leyfishafa. Á sölusvæði er hvorki gert ráð fyrir tengingum við fráveitu né vatnsveitu.
- Forsendur fyrir notkun á opinberum svæðum er að björgunar-/viðbragðsaðilar hafi ávallt greiðan aðgang og viðunandi starfskilyrði.

#### **4. gr**

## Útlit, aðstaða og merkingar

- Gerð er sú krafa að útlit söluvagns/söluskála fari vel í umhverfinu, að efnisnotkun, ásýnd og yfirbragð sé vandað og við hæfi á þeim stað sem salan á að eiga sér stað.
- Öll viðföng, ruslafötur, skilti, merkingar, borð og annað tilheyrandi skal tilgreina í umsókn um stöðuleyfi. Einungis er heimilt að hafa tvö 6-8 manna áningaborð við hvern söluvagn og að lágmarki þurfa að vera tvær ruslatunnur við söluvagn.
- Óheimilt er að setja upp hvers kyns auglýsingaskilti og merkingar varðandi söluaðstöðu utan við skilgreint sölusvæði. Skilti innan skilgreinds sölusvæðis má aðeins auðkenna viðkomandi sölustarfsemi.

### 5 gr. Gjald

Vegna stöðuleyfa sölubása eða söluvagna er greitt stöðuleyfi samkvæmt gjaldskrá byggingarleyfisgjalda 2018 sem er kr. 40.000,- á tímabilinu.

### 6 gr. Uppsögn. Lok og afturköllun leyfis

#### Eftirfarandi ákvæði gilda um uppsögn, lok og afturköllun söluleyfis:

- Samningur getur hvenær sem er verið afturkallaður ef ákvæði samþykktar þessarar eða önnur atriði samnings hafa verið brotin, án endurgreiðslu leyfisgjalds.
- Samningur getur hvenær sem er verið afturkallaður ef áform eru um að svæðið verði notað í opinberum tilgangi, skal þá endurgreiða leyfishafa eftirstöðvar leyfisgjalds.
- Leyfishafa er gert skylt að laga sig að vega- og byggingaframkvæmdum og viðburðum á götu- og torgsölusvæðum, sem geta leitt til tímabundins flutnings og/eða afturköllunar leyfis. Leyfishafa skal tilkynnt um slíkar ráðstafanir með minnst viku fyrirvara.
- Ekki eru greiddar bætur fyrir tímabundna afturköllun á götu- og torgsöluleyfi vegna viðhalds eða annarra aðkallandi verkefna veghaldara og landeigenda á staðnum.

### 7 gr. Aðrar reglur

Leyfishafar skulu hlíta gildandi lögum, reglum og viðmiðum sem ná yfir starfsemina og umgjörð hennar. Í þeim tilvikum sem starfsemin krefst frekari leyfa en stöðuleyfis skal leyfisumsækjandi afla þeirra. Óleyfisstarfsemi verður tilkynnt til lögreglu.

**Hreppsnefnd Eyja og Miklaholtshrepps**  
**12.03.2018**